

Wallensköld

I.

Tout autresi con l'ente fet venir
li arrousters de l'eve qui chiet jus,
fet bone amor nestre et croistre et florir
li ramenbrers par coustume et par us.
d'amors loial n'iert ja nus au desus,
ainz li couvient axi desouz maintenir.
Por c'est ma douce dolor
plaine de si grant poor,
dame, si faz grant vigor
de chanter, quant de cuer plor.

II.

Pleüst a Dieu, pour ma dolor garir,
qu'el fust Tisbé, car je sui Piramus;
mès je voi bien ce ne puet avenir
ensi morrai que ja n'en avrai plus.
Ahi, bele! Con sui pour vous confus!
que d'un qarrel me venistes ferir,
espris d'ardant feu d'amor,
quant vos vi le premier jor.
Li ars ne fu pas d'aubor,
qui si trest par grant douçor.

III.

Dame, se je servisse Dieu autant
et priasse de verai cuer entier
con je faz vous, je sai certainement
qu'en Paradis n'eüst autel loier;
mès je ne puis ne servir ne prier
nului fors vous, a qui mes cuers s'atent,
si ne puis apercevoir
que ja joie en doie avoir,
et si ne vos puis vooir
fors d'euz dos et de cuer noir.

IV.

Le prophete dit voir, qui pas ne ment,
que en la fin faudront li droiturier,
et la fins est venue voirement,
que cruautez vaint merci et prier,

ne servises n'i puet avoir mestier,
ne bone amor n'atendre longuement,
ainz a plus orgueus pouoir
et beubanz que douz vouloir,
n'encontre Amor n'a savoir
q'eatendue sanz espoir.

V.

Aygles, sanz vos ne puis merci trouver.
Bien sai et voi qu'a touz biens ai failli,
se vous ensi me volez eschiver,
que vous de moi n'aiez quelque merci.
Ja n'avrez mès nul si loial ami
ne ne porroiz a nul jor recovrer.
Et je me morrai chetis,
ma vie sera mès pis
loing de vostre biau cler vis,
ou nest la rose et li lis.

VI.

Aygle, j'ai touz jorz appris
a estre loiaus amis,
si me vaudroit melz un ris
de vous qu'autre paradis.

- letto 393 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/wallensk%C3%B6ld-62>